

Jangan kaitkan Perkasa dengan PPBM, kata Ibrahim Ali
Free Malaysia Today
Okt 10, 2016
Mohamad Fadli

Sebarang penyertaan ke dalam parti yang diasaskan Tun Dr Mahathir Mohamad atas kapasiti individu

PETALING JAYA: Datuk Ibrahim Ali mengingatkan semua pihak untuk tidak mengaitkan Perkasa dengan Parti Pribumi Bersatu Malaysia (PPBM), yang diasaskan Tun Dr Mahathir Mohamad.

Presiden Perkasa menjelaskan penyertaan ahli ke dalam parti itu tidak mewakili pendirian atau sokongan gerakannya, kerana ia dibuat atas kapasiti individu.

“Ahli yang menyertai PPBM tidak perlu sebut ahli Perkasa kerana itu hak peribadi.

“Jika mereka keluar parti pun atas nama individu, tak perlu sebut Perkasa,” katanya kepada FMT.

Perkembangan mutakhir ini menyaksikan beberapa pemimpin gerakan seperti Yang Dipertua Perkasa Selangor Abu Bakar Yahya melepaskan jawatan dan menyertai parti Dr Mahathir.

Abu mendakwa pengikutnya dalam Perkasa akan mengikut jejaknya kerana percaya parti itu satu-satunya parti yang meneruskan perjuangan membela nasib bangsa Melayu dan negara.

Ibrahim berkata belum ada ada ahli Perkasa meletakkan keahlian setakat ini.

Beliau turut menjawab kecaman DAP terhadap ahli Perkasa yang menyertai PPBM. Ahli Parlimen Segambut Lim Lip Eng menyifatkan mereka sebagai ‘katak politik’ dan mengancam akan menolak semua kerjasama dengan golongan itu.

“Dalam DAP pun ada ‘katak’. Contohnya Dr Abdul Aziz Bari yang daripada PKR masuk DAP. Pemimpin Amanah semuanya ‘katak’ daripada PAS. Dalam PKR pun ada ‘katak’.

“Sekarang ‘katak’ ada di mana-mana. Sungguh lucu dan aneh DAP,” kata Ibrahim.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalysiatoday.com/category/bahasa/2016/10/10/jangan-kaitkan-perkasa-dengan-ppbm-kata-ibrahim-ali/>